



## ARTICULI

*Circa Librorum approbationem observandi, ex Decreto sacre Facultatis Theologiae Parisiensis, die 1. Junii anno Domini 1696.*

I.

**N**ominabuntur singulis annis à sacra Facultate sexdecim Magistri, qui ex officio lectioni Librorum incumbent.

II.

Sexdecim illi Magistri assumuntur, scilicet, quatuor ex Domo Sorbonica, quatuor ex Domo Navarrica, quatuor ex iis qui nulli sunt ascripti familiae, quatuor denique ex Regularibus.

III.

Omnes & singuli Magistri qui comitiis interfunt, poterunt supplicare pro lectione & approbatione Librorum.

IV.

Poterunt quoque Librorum Authores, dato ad Facultatem libello, supplicare ut ~~illorum~~<sup>eorum</sup> Libri à Magistris nostris approbentur.

V.

Antequam supplicatio instituat pro cujuscumque Libri lectione & approbatione, illius titulus deferetur ad Syndicum.

VI.

Qui supplicaverit, sive Magister, sive Librorum Author, assumet duos quos voluerit ex sexdecim nominatis, qui Librum pro cujus approbatione supplicatio fuerit instituta, ex officio legant unà cum Magistro, si quis fuerit, qui pro ejusdem Libri lectione & approbatione supplicaverit.

VII.

Inter Magistros qui Libros approbabunt, semper aliquis Magister secularis occurret.

VIII.

Præter duos Magistros ex sexdecim nominatis, & Magistrum

2  
qui supplicaverit, poterunt & alii Magistri, ut ipsis libuerit unum eundemque Librum approbare, modò tamen plura approbationum instrumenta non conficiant, sed omnes uni eidemque approbationi nomen suum apponant.

X.

Qui pro approbatione alicujus Libri supplicare voluerit, manuscriptum autographum ad sacram Facultatem afferet, fidemque faciet proloquo Authoris testimonio, illud nondum esse typis mandatum.

X.

Unusquisque Approbatorum integrum manuscriptum perleget; quâ lectione absolutâ, notabuntur apud Magistrum è Sæcularibus antiquiorem, si quæ sint in illo correctione digna.

XI.

Duplicem correctionum indiculum facient Magistri Approbatores, quorum alter ab Authore Libri, vel illius curam gerente, subsignatus remanebit penes antiquiorem ex Approbatoribus sæcularem; alter tradetur Authori Libri, vel illius curam gerenti, ut secundum ejusdem indiculi fidem quæ erunt corrigenda corrigat.

XII.

Postquam typis mandatus fuerit Liber, & observaverint Magistri Approbatores, omnia secundum fidem indiculi fuisse correctâ, tunc antiquior deputatorum sæcularis referet ad Facultatem, nihil obstare quominus hic Liber approbatione donetur; reddetque Authori indiculum correctionum qui fuerat ab eodem Authore subsignatus.

XIII.

Nullus supplicabit pro lectione Libri à viro Religioso scripti, cujuscumque Ordinis aut Congregationis fuerit, seu Regularium simpliciter, vel Clericorum Regularium, vel denique eorum qui in communi quadam societate sub unius Superioris obedientia vivunt, quin prius sibi tradi provideat ejusdem Superioris licentiam, quâ constet dicto Regulari facultatem Libri edendi fuisse concessam, quæ quidem licentia apud majorem Apparitorem deponetur, qui illam cum opus fuerit Facultati representabit.

XIV.

Nullus Libros ab Hæreticis cujuscumque sint argumenti conscriptos approbabit, nec libellos quoque à mulieribus compositos.

XV.

Nullus supplicabit pro lectione Libri anonymi, nisi Author ipse



privatim apud Magistrum qui supplicare voluerit, testimonio propriâ manu subsignato, apud eundem Magistrum asservando, Authorem se ejusdem Libri profiteri malit.

X V I.

Approbationis instrumentum simplex erit, & absque elogiis, his conceptum terminis. Nos infrâ scripti Doctores Theologi Parisienses, testamur ex mandato sacræ Facultatis legisse, examinasse, & censuisse Librum cui titulus est . . . . . nihilque in eo deprehendisse Fidei Catholicæ, aut bonis moribus contrarium; in quorum fidem subscripsimus. Si verò Liber sit Gallicè conscriptus, approbatio his erit concepta terminis. *Nous soussignez Docteurs en Theologie de la Faculté de Paris, certifions que par l'ordre de ladite Faculté, nous avons lu & examiné un Livre qui a pour titre . . . . . & que nous n'y avons rien trouvé de contraire à la Foi Catholique & aux bonnes mœurs; en foy de quoy nous avons signé.*

X V I I.

Curabit antiquior Approbatorum sæcularis, ut exemplar Libri approbati, si non manuscriptum, saltem typis excussum in publico Facultatis tabulario asservetur.

X V I I I.

Magistri qui Lutetiæ non degunt, quandoquidem apud sacram Facultatem pro lectione & approbatione Librorum supplicare, aut duos ex sexdecim nominatis ad eorumdem Librorum lectionem & approbationem secum assumere nequeunt cæteros hujusce decreti articulos, in approbandis Libris accuratè observabunt; valebitque illorum approbatio ut privata, quam conscribent ut suprâ, omiſſis tamen his terminis, *ex mandato Facultatis.*

X I X.

Ut hoc Decretum accuratè observetur, illud typis mandandum censuit Facultas, & illius exemplaria omnibus & singulis Magistris distribuenda; necnon unicuique Superiori Familiarum quæ ad Facultatem spectant, ut suis qui Doctores sunt, ubicumque degant, illud quamprimùm significant, ne quis illius ignorantiam prætexat.

*De Mandato D. D. Decani & Magistrorum  
præfate Facultatis Theologiæ Parisiensis  
DE CHAMP-VEILLE.*

Chen  
Wing  
folio  
02  
144  
A1  
V.2  
no. 78

THE NEWBERRY LIBRARY